

豫章叢書

第六九冊

揭文安公詩集卷六

元 揭傒斯 曼碩

孤松篇壽王大學士

大地凍欲裂孤松高穆清橫睨太華嵩俯察蓬與瀛
天風四浩蕩身與元氣并根深本自固雪霜空崢嶸
白晝甘露降半夜朝陽升飛枝蔭扶桑勁氣摩欂櫨
羣鳳所託命百鳥徒嘲鳴冥冥廣寒宮丹桂亦虛生
八萬四千人何時月常盈維此天一柱千歲所養成
自非堯舜君工垂焉敢徵漢武作建章千門照西京
掄材當此時餘柯了棟楹天地既有此未必終無情

蒼蒼歲寒心永世仰堅貞

和族子節京城客思

歲月日夜去爲誰催鬢華開愁一萬緒強半是思家
翠栢總無態寒梅空自花京城豈不戀其奈故園賒

登薊丘

閒登薊丘望西北削諸峰轉覺地天肅因悲霜露濃
雲寒何處笛日落滿城鐘自笑棲遲者唯堪學老農

送雷巡檢赴雅州

爾祖爲州處

其先雷簡夫嘗知雅州

君今往微巡弓刀秦塞曉

耕稼蜀山春勲業觀初服朝廷念遠民黃金世所貴

亦是賤吾身

壽王樞副致政

蓬矢桑弧百世期蒼松翠栢歲寒知二疏祖帳都門
後司馬深衣洛下時賓客過門唯飲酒兒孫在眼自
爲師著書謾有春秋志何似勲名竹帛垂

贈淳真子張太古

蕩蕩白玉京超超淳真子十二求神仙服事丘與李
嵩洛二十載結茅白雲裏殮是陽谷霞飲是玉池水
鬼神莫能識百念吹不起一朝忽騰化徑去不可遮
飛駟服五龍角巾搖三花朝發扶桑國暮宿河漢槎

朝食千歲桃暮食五色瓜長揖青牛君高歌渡流沙
還憇金張邸調笑許史家日食五侯鯖安得厭胡麻
春風長安陌落日邯鄲道迎人上青天送人入秋草
疎身八極外天地忽已老寄謝區中人全真以爲寶

許判官挽詞

判官名松字世茂其先蜀人宋給事中許奕
之孫也大德中掾湖廣行省時與予相知出
婺源州判官赴調京師授饒州路樂平州同
知致仕拜命而卒今歸葬廬山云

南從江漢北幽燕生死相知二十年空有明恩容致

政更無餘景待歸田六丁愁闢還鄉路五老催迎上
水船遙想平生宦遊處尙將遺愛向人傳

送何秀才南歸

獨抱青雲器南迎旅鴈歸面無遊子色身是別時衣
荒淀猶含凍垂楊盡欲飛送君河水上予亦暫相違

題金人王仲寶墨竹

種竹幽薊中不及楊與柳微陰未佈地忽已如敝帚
葉公稱好龍龍至乃驚走蕭蕭數叢碧粉墨亦何有

胡編修挽詞

名維新

寂寞詞垣裏凋零忽及君那知洛陽客竟作薊州墳

有死誰能免無生亦早聞寡妻從弱子悲絕不堪論

送陳講主奉詔校經罷歸餘杭

君始爲僧號若講主門徒五百

餘人後以許昌趙既明言乃反初服

聖主隆象教金書開寶坊校讐延茂德吾師自南邦
秋至夏言還優賚煥朱光季月風雨交白晝倏炎涼
松樾有餘蔭逝將異河江軒車凌晨集飛錫上孤航
威遲魏闕心惆悵吳天長要本無所住焉計行與藏
命至遵遐事今已還故鄉出處何表如徙倚徒慨慷
校經慶壽寺
寺有松樾軒

秋夜長

秋夜長秋夜長夜未央明月曜我牖清風薄我牀夜
長夜長誰與當秋夜長秋夜長夜未曙投我以百憂
煎我以百慮夜長夜長誰與度秋夜長秋夜長夜何
長人自傷

廖母詩

京城孝節何紛紛請言寧都廖母陳壽年九十有九
春七十多載孀居人至元丙子兵入贛鐵騎四野屯
如雲子死鋒鏑婦囚虜膝下唯有七歲孫哀哀無父
復失母出入相逐牽衣裙朝事織爨夜緝紉育之數
之恩且勤一門二世惟此孫危甚一髮懸千鈞春見

花開渾是淚秋逢月好但傷神傳家有人祭有主便
堪含笑入丘墳阿孫幸得成軀幹却憶從前乍離亂
阿孫涕淚無昏旦誓求父骨何由見忽有指以墳塚
間得之自謂神所贊阿婆見子孫見父彷彿若覩平
生面銜哀負苦就窀穸四境傳聞盡驚嘆又聞有母
在滄洲拜辭阿婆將遠求風行水宿幾千里及到母
已爲荒丘割牲醢酒拜塋下慟哭天地爲悲愁母旣
有家難返塋泣奉木主回歸舟及門阿婆相向哭哭
罷掘衣陳席羞筮日備禮躬合塋聊且少慰終身憂
稽諸典禮雖未愜母翼出母禍有由緣情起義何不

可君子幸恕毋相尤阿婆年紀日已老阿孫有子子
且好滑甘滷醢無缺供溫清煥寒如襁褓阿婆貞節
霜凜凜阿孫孝行日杲杲一家盛德千載榮衣賜布
帛門有旌歲時州長升堂拜遠近詞人流頌聲便當
書之太史錄永與後世垂儀型

送甯上人歸五公寺

其自號
無可

五公開講地遺跡自梁陳古鎮風煙合雕梁日月新
歸舟連歲暮破袖出京塵只道無應可那知有更真
慈化寺邇上人題黃金書華嚴經

翠竹黃花到處行南泉山色白青青給孤長者金如

土知寫華嚴幾卷經

普連宋主佛中寶別石上人僧裏珠識盡華嚴眞富
貴更教行脚聚金書

謙上人自牧詩

謙公非黠仍非癡自吹短笛隨童兒無羊無牛何處
牧有鞭有箠誰得施牛未嘗無未嘗有鞭未嘗前未
嘗後沙平草軟春日晴月白風清秋露曉朝來暮返
幾春冬短壟長坡處處同惟有羅池千丈碧歸然不
動白雲中

送玄上人

清江古鎮封谿道靈峯寺中玉泉好靈峰上人天上
歸親見六龍天上飛湧金門外潮來去曾是錢唐江
上住十里松風六月寒夢寐猶思徑山路自參天日
老禪師始信靈峰路不迷却被無端徵詔起等閑來
往不曾知黃河萬里從西下呂梁百步如犇馬歸去
山中問玉泉應向海門深處瀉

寄姑蘇張大監

聞說茅山去冥冥不可尋祇應雲作伴復有月知心
松葉寒逾響泉聲晚更深如何聖明主肯使在山林

送茂公

承恩初出白雲間
天上龍髯不可攀
短袖空藏寫經手
朔風先入望鄉顏
孤舟落日仍憂盜
千里黃塵不見山
歲暮歸來問松竹
清江依舊繞禪關

樂城范節婦郭氏詩

但使姑存若見夫
何堪未老并無姑
幾回淚洒墳前草
只恐春殘草亦枯

巷有歌聲門有旌
無因解得死生情
傷心唯有窗前月
長照寒機半夜聲

女弱兒癡日夜憂
兒長女大更堪愁
一身生死無窮事
鏡裏何時見白頭

立春病述

病裏見陽春天衢物物新朝光殘雪案暮齒五雲身
得失從違異羈縻出處均官資不必貴但問汝何人

答程敬甫見和

天地忽爲春四時更故新獨憐多病客猶是未閒身
堯舜居皇極蕭曹秉國鈞吾徒無寸補羞見舊家人

元宵和張伯真

闕下元宵又七年酒光燈影共連娟春生垓北浮無
際月掛虛空滿大圓昔在盛年曾許國老來多病更
妨賢每逢佳節惟增感自信行藏莫問天

和劉錄事春雪二十韻

孟春陰陽戰天地日相磨南風作先驅北風爲之佐
雪勢忽崩騰十日驕不挫坐令羣生跼無乃真宰過
初疑鴻蒙開歛若虛空墮山嶽盡埋沒寧復顧么麼
遂使一束薪自銜千金貨枯枿亦摧勢勾萌豈能荷
翻愁地軸弱但見天機大安得斬馬劍陰慙一時剋
臭腐自神奇糠粃自揚簸吾心如堅壁猛士安敢破
丈夫非憂患何由激衰懦人方履冰走我正掩關臥
如何去年冬陽倡陰不和飛翼未布地忽霽欲誰柰
羣動不肯蟄裘褐亦交脣春來復何爲僅足收堀堁

明朝化泥潦反使憂坎圻城南嚴教授豈昔伯休那
陪凍日相從憐我困痰唾河濱劉錄事日以詩自課
衝寒數過門亦復哀我驕雪後復多風日受塵土浼
連旬苦上壅達旦擁衾坐乃知書生窮只合守寒餓
天時與人事倚伏分福禍幸逢天子聖大化已潛播
家無橘千頭亦有竹萬箇投簪返田里濁酒聊自賀

奉和傅與礪對雨見懷

轉覺江南氣候添燕山正月雨纖纖乍驚瑟縮鳴歌
枕忽作罪微傍卷簾愛竹不勞晴復灌收書猶恐巧
能沾故人只在城東住獨對春聲繞四簷

和傅與礪近日二首

近日何多念頻年一肯還
河流無故道春色是他山
幾兒看雲凭衡門罷月關
無情寒與暑偏解鑄衰顏
此景何時定浮雲竟日飛
客懷閒裏積人事病來稀
凍解魚龍喜春深鳥雀肥
脩脩窗上竹清影不曾違

胡氏方齋詩

邈哉古初皞乎雍熙樸琢麗勳氣變風移聖人有作
敦典叙彝懼人而漓託言詩書詩書不言日數以隳
皎皎素絲化而爲緇大江之東彭蠡之涯有懿君子
姚虞之支率性蹈常友悌孝慈用罔弗推動罔弗思